

Ukioq 2025-imiit nutaamik umiarsuarmik sinersortaateqalernissaa siunertaralugu Naalakkersuisut pilersaarummik suliaqarnissaannik Inatsisartut aalajangiiffigisassaattut siunnersuut, taamaasilluni pilersaarut kingusinnerpaamik UKA 2023-imi saqqummiunneqassaaq.

(Inatsisartunut ilaasortaq Anders Olsen, Siumut)

Akissuteqaat

(Ineqarnermut Attaveqaasersuutinullu Naalakkersuisoq)

Aappassaaneerneqarnera

Aallarniutigalugu Sanaartornermut Ataatsimiititaliap immikkoortumik peqqissaartumik suliaqarsimaneranut, siunnersuummullu matumunnga isumaliutissiissutaanut Naalakkersuisut ataatsimiititaliamut qujapput.

Naalakkersuisut allannguutissatut siunnersuutigisaat Sanaartornermut Ataatsimiititaliap tapersersormagu nuannerpoq. 2025-p kingorna ilaasunik angallassinissamut tamakkiisumik pilersaarutissaq pillugu Naalakkersuisut kiisalu Sanaartornermut Ataatsimiititaliap eqqartueqatigiinnissaannut qilanaarpunga.

Siunnersuuteqartoq, Sanaartornermut Ataatsimiititaliaq kiisalu Naalakkersuisut isumaqarput, Sarfaq Ittuk naatsorsuutigisamik 2025-mi atorunnaarpat siunissami ilaasunik angallassisarnissaq maannangaq eqqarsaatigineqaruni piffissaagallartillugu isumatusaarnerusoq.

2025-p kingorna ilaasunik angallassisarnissaq tamatta peqataaffigisinnaasatsinnik, innuttaasunullu naammaginartunngorlugu ataqatigiissaarneqarnissaa Naalakkersuisunut pingaaruteqarpoq. Ingerlatsisut attuumassuteqartut oqaloqatigineqarnerisigut akuutinneqarnerisigullu tamanna aatsaat angusinnaavarput.

Taamaattumik sulinissami suliaassanut akuutitsinissaq oqaloqatigiinnissarlu tunngaviusussatut Naalakkersuisut isigaat. Takornarialerinerup ineriartornera ilaasunik angallassinissaq pillugu pilersaarutissami eqqarsaatigineqarnissaata qulakkeerneqarnissaani akuutitsinissaq, oqaloqatigiittarnissarlu pitsaanerpaapput.

Taamaattumik oqallilluarnermut Inatsisartut qutsavigaakka, taamatullu oqaaseqarlunga allannguutissatut siunnersuut saqqummiunneqartoq akuersissutigineqassasoq Naalakkersuisut sinnerlugit inassutigaara.